

Měza spòd wòza

TÓMK FÓPKA

Sedzã. Pò same òse. W gãsti mazënie, co nie chce mie wëpùscëc na swiat. Ani w przòdk, ani w tił. Mój wiérny autòł ni mòże rëszëc z mòla. Leno mrëczy cos pòd maskã...

Zymk. Przedzymbk dokładno. Jesz snieg nie òdtajòł, a zemi teskno do słuńca. Wanoga japòńsczim autòłã pò kaszëbskich drogach. Rëklënowatë, mëzglatë – nie-pòrządne, ale prowadzã do pòrządnych lëdzy. Prowadzã dodóm.

Te durowatë drodzëska pòmògają w robienim bëlnëch uczinków. Kò nie je to bëlno pòmòc kòmùs? Wëcygnãc z plëtë, kału, rowù czë jiny przesprawë? W całoscë białce, co zatrzasa klucze bënë òbczas tankòwaniò, abò ni mòże wëjachac z parkingù... Jaczi sã z nas ricerze robiã, dzentelmeni...

Sóm jem miòł czile taczich tarapatów. A to mercedesowim furgònã z lodama za Kartuzama do rowù sã zesënał... A to mój 126p sóm zjachòł z górczi, chòcò jem zacygnãł rãczny... A to zòs w lasu zawisnãł na jaczim kòrzeniu feliciã... Abò kòrolkã wjachòł na kam pòd sniegã skrëti na parkingù przed pizzeriã w Mòliim Kackù... A kùreszce stanãł àuriskã wsurpniony przez miedłòwkã kòl Dolmierza...

To wszëtkò wëzdzi pòdobno. Jedzesz. Widzysz przeszkòdã. Zarzãdzywòsz: jadã! Póczi robisz to dristno, tej jesz graje. Leno czëj kãsk przescygniesz, nòtëra pòkòzywò, że to òna je mòcniëszò. I do przòdkù, i do tëtù – i jesz ròz, i jesz... Sprzãgło sã pòli, rutë wëczapònë a të sóm zmòkli, i zli. I wësòdòsz. W lakerkach i ancugù òbchòdzysz plac tragedie. I klniesz a Bòga przëzywòsz nadaremno.

– Za czim jem sã tam pchòł!

A colemało sã prawie dze mòckò spieszisz...

Terò sã dwie drodзи. Abò spòkòjno zdajesz i pieszisz np. piesniã, co ju dòwno mia bëc napisònò, abò... zwònisz. Mòbilkã, zelë mòsz chòc jednã kreskã. Przë tim mòzesz

wëzerac za jinym klamòtã, co je tëlì wikszì, cobë ce wëcygnãc. Temù wòrt je miec mòtë autkò... (Niechtërne białczy zlostlëwie gòdają, że chłop kùpiwò wiòlgã maszinã, czëj mù czegò nie sygò, je kòrusowati a chce so kãsk tim dodac...).

Czekòsz na autòł, a tak pò pròwdze na czlowieka, co sã zlitëje i cë pòmòze. Dzël lëdzy nie lëdò prosëc, tak tej to jima drãgò przëchòdò...

Zelë ju sã chto łaskawie zatrzëmie, to nie znaczi, że òn pòmòze. Mòze mù sã tész co zepsëc abò na cygaretã so przerwã zrobi, abò na co jinégò... Równak zlë stanie ju w twòji sprawie, tej mòze abò cã pòpchnãc abò pòcygnãc.

Pòpichò colemało rãkama razã z jinyma, co sã do te włączã – chiba że jes zajachòł na taczë përdëgònë, że zëwi dëszë na sto pòcërzów wkrag nie nańdziesz... Zlë jidze ò cygnienië, mùszì bëc linka. Nòlepi, że lezi òna w twòji paczëtnicë. Jak nié, tej je mùsz sã mòdlëc, że ten drëdзи jã mò...

Jedzemë dali. Chtos cygnie, të pòmògòsz. Nie hamù-

jesz! Prosto kòła trzimiesz. Pòmògòsz.

Wëëëëëjachelé! Twòja maszinka ùnuzlònò a reszta felów sã òdezwie na szasëju.

Terò trzeba pòdzãkòwac. Czasã sygnie wëcygnãc walutã tipù „bògzãplac” – czëj cã wëpchnã, w całoscë. Czëj ju treker je w robòce, tej je nòt dac chòc na piwò. Jem nawetkã ròz midzë Nòwczã a Strzebielënã pòdzãkòwòł zbiërkã eroticznëch wiërtzów... Në, ale tej jem bëf fest zatoniony...

Jak wzywòsz specjalistã, tej szëkj sã na wëblãkòwanië pòrã „papierów”. Chiba że rëchli wëkùpisz ùbezpieczenië „assistance” – to ce zwiezã do warsztatu, a tam ju z ce skòrkã zedrzã...

Jo. Nasze drodзи sã drodzë a drãdzë je pò nich jezdzenië. Taczì òkrãt sobie jedze pò mòrzu, nòwëzi dze jakã dragã załòzi. A më, łãdowi Kaszëbi, bez te sztërë kòła jiscënków mómë skòpicã. Në nick, jadã dali...



Nasze drodзи sã drodzë a drãdzë je pò nich jezdzenië.

Měza, mazëna, miedłòwka – błoto na drodze; **òs** – oś; **mòl** – miejsce; **zymk** – wiosna; **przedzymbk** – przedwiosnie; **rëklëne** – wyboje; **mëzglatë** – rozmięktë; **durowatë** – dziurawe; **plëta** – kałuża; **kòł** – błoto; **przesprawa** – przygoda; **w całoscë** – szczególnie; **bënë** – wewnątrz; **òbczas** – podczas; **zòs** – znów; **wsurpniony** – wessany; **dristno** – śmiało; **kãsk** – ciut; **przescygnac** – hamować; **rutë** – szyby; **wëczapònë** – wybrudzone; **zmòkli** – spocony; **ancuch** – garnitur; **colemało** – zazwyczaj; **prawie** – własnë; **zdac** – czekać; **kòrus** – tu: mikrus; **drãgò** – z trudem; **równak** – jeśli już; **përdëgònë** – miejsce niezamieszkanë; **paczëtnica** – bagażnik; **nòt** – trzeba; **fest** – mocno; **wëblãkòwanië** – tu: zapłata; **draga** – kotwica; **jiscënk** – zmartwienie; **skòpicã** – mnóstwo.